

求恕齋
叢書

雪橋詩話

二

雪橋詩話卷第二

遼陽楊鍾義撰集

吳興劉承幹參校

泰興季開生天中官給事順治十二年秋乾清宮成敕
遣內監至江南采辦器物途中多有訛言上疏諫下刑
部杖贖流尙陽堡謫居五年卒于戍所其關前志別詩
云今日玉關無內外臨歧握手莫潛然尙陽堡卽事二
首云振臂隨呼耕戰場野人苜蓿隔溪香探梅舊約虛
雲夢采蘋新歌徧夜郎回首中原今牧馬驚心要地昔
亡羊無棲鳥雀知多少嘯向長城似望鄉五雲長繞舊

皇畿萬里孤城寄翠微極塞有山多北向重邊無水不
西歸雞鳴夢訝朝參晚鳥哺心傷進膳遲甯惜煢煢沙
磧影難隨雙燕入關飛送左大來葬詩云未遂首邱須
淺葬好留枯骨待恩波十七年詔賜環開生已沒復原
官還其櫬

吳縣范檢討必英諸將詩云無諸臺上英風起千載重
來顧盼雄父子河山兼兩越弟兄花燭盛中宮雕旗鐵
陣參雲黑龍馬珠江浴日紅回首伏波銅柱遠軍威更
在挹婁東爲耿精忠未謀逆以前作也鄧州彭布政而
述初到滇池詩云劍南風物值初秋萬里炎荒據上游

水下蘭滄通大夏山連蔥嶺接姚州漢威遠播姑繒塞
王爵新分畋町侯況是白狼新作頌銅標應過海西頭
亦三桂未反時作

陳其年讀史雜感云董承嬌女拜充華別殿沈沈鬪鈿
車一自恩波專戚里遂令顏色擅官家驪山戲馬人如
玉虎圈當熊臉似霞玉柙珠襦連歲事茂陵應長並頭
花此詩當與梅村清涼山讚佛詩同時作吳詩陸祁孫
謂爲崇禎帝作恐尙未得本旨之所在讀史有感句云
君王縱有長生術忍向瑤池不並棲意尤明顯

定州郝雪海中丞同王無煩游石氏祇園二首云側身

雙樹入花氣浣衣裳不道千年雪融成百合香落紅嬌
小築凝翠溼回廊尙有安巢燕呢喃問覺王金谷分明
在相看作化城青山如假寐飛鳥自呼晴花燦陽春笑
松流大壑聲幽情誰復憾況共虎谿行雪海字冰滌復
陽其別號也先世自洪洞徙居中山順治中以御史巡
按四川吳三桂驕橫兵不戢屢上疏陳逃兵劫殺狀復
語侵三桂三桂恚劾以欺罔謫戍遼陽垂二十年讀書
不輟同徙者贈以詩有祇愁深夜裏凍殺蠹書蟲之句
三桂反用魏環極疏復故官尋出撫廣西卒予祭葬汪
茗文誌其墓云士大夫謂天子於公旣簡諸生前又

卹諸身後曰廉曰潔稱許再四何其知公之深也琬則
以今上固知公矣勿謂先皇帝不知之也三桂兇
燄方張公以一書生顧獨不揣而與之抗微先皇帝
則公之元己喪而肉己齧矣假令不示薄譴以稍殺其
怒則三桂反必速速則內煽川盜外連滇寇秦楚間滋
未易定也以故譴公于遠使避三桂其緩三桂之反而
留公爲今上腹心股肱之佐先皇帝之心豈易測
也哉

馮贇雲仙雜記帝觀書處窗戶玲瓏相望金鋪可觀輝
映溢目號爲閃電窗吳蘭次綺有詩云甲夜猶傳駐御

幢一朝芸帙冷明釭蛛絲似也知人事網徧金泥閃電
窗吳江都人順治九年以拔貢生授中書舍人奉詔譜
楊椒山傳奇遷武選司員外郎蓋卽以椒山原官官之
其入署句云閒拂案塵攤好句一杯涼水祭椒山康熙
五年以水部郎出知湖州吳興有藝香山爲西施種蘭
處取以名詞宋玉叔序云蘭次出守吳興下車伊始廉
得大猾主名單舸禽治而殲之湖人歡聲動天地最工
於詞其吳興一闕有曰詩瓢酒盞茶爐是閒中簿書斯
可以見其志矣湯文正贈吳湖州詩仙郎起草最知名
幾載褰帷雪上行按部雨餘香稻晚勸農花發曉雲輕

南宮書畫添新稿李相亭臺續舊盟聞道賓朋常滿座
清尊眞見古人情其浣溪紗云吳苑青苔鎖畫廊漢宮
垂柳映紅牆教人愁殺是斜陽天上無端催曉暮人閒
何事有興亡可憐燕子只尋常譚復堂謂東風紅豆最
下最傳似此含悽古淡乃爲不負罷官後游嶺南撰風
物紀一卷晚年兩目失明自號聽翁後方青來以金鍼
治之而愈

程可則周量一字湟溱號石臞小字佛壯順治壬辰進
士第一忌者擠而去之庚子應閣試授撰文中書尋改
內秘書院嘗撰端敬皇后誄爲

孝陵所嘉賞癸丑由職方郎中出守桂林五言有人煙
寒大陸山雨急長河之句其送一靈上人歸羅浮卽屈
翁山七夕鄉感和鐵夫卽姜梗梗號桐柏會稽人有曹
山草堂飯犢居等集龔芝麓送姜鐵夫詩云東海姜公
子詩名鄴下傳朱琴森古調霜角警秋天酒罷登樓地
燈深讀史年多情還涕淚官柳玉鞭前

三原孫豹人貌魁梧好講兵事爲諸生遭流寇散家財
給客集義勇數千思殺賊自效旣爲賊所敗落深塹得
不死走江都學賈三致千金皆散去乃僦居董相祠旁
名其居曰漑堂烹魚釜鬻寓西歸之意閉戶攻詩古文

辭高不見之節漁洋司李揚州訪之先以詩云焦穫奇
人孫豹人新詩雅健出風塵王宏不見陶潛迹端木甯
知原憲貧遂爲莫逆交有抱琴圖小像漁洋題詩云絕
礪長松不世情科頭箕踞一先生胸中磊砢無人語落
落琴聲大蟹行宗定九題云長松千尺挺宜陽箕踞孫
郎態更狂世上知音人不見一絃扯去見稽康一日游
焦山中流遇風舟幾覆賦詩云風起中流浪打船秦人
失色海雲邊也知賦命原窮薄尙欲西歸太華眠其題
焦山僧房采桑子云老僧頭白焦山頂不管興亡安穩
禪牀臥對江南古戰場客來久坐渾無語飯熟茶香歸

路茫茫水打船檣月照廊甲辰漁洋內遷豹人送別有
句云欲問忘情老何名共命禽難言無所住齊有淚沾
襟其五言小樂府云蕭儼向舒州君王怒未休樓高苦
無井不及景陽樓又云置酒宣華苑君王好酒悲韓昭
方用事涕淚莫輕垂舉詞科辭以老病不許居既久諸
待試闕下者多務研鍊爲詞賦豹人獨汎覽他書閒語
客曰吾僑居廣陵數十口饔飧待我使我官京師不令
舉家餓死乎已入試不終幅而出得旨凡年老者悉授
銜使歸及格者七人豹人與焉吏部集驗於庭獨臥不
往旋被敦促乃徐入逡巡主爵者見其鬢眉皆白引之

使前曰君老矣豹人直對曰我年四十時卽若此且我
前以老求免試公必以爲壯今我不欲以老得官公又
以爲老何也部擬授司經局正字回籍 上特予中書
舍人初得正字賦詩云一官如籠鶴萬里本浮鷗獻賦
曾非晏童年又異劉山人今上路小婦免登樓臨水看
蝌蚪惟添錯字愁海甯陸嘉淑贈詩有增年辭試減辭
官之句施愚山送豹人歸揚州序云其詩操秦聲出入
杜韓蘇陸諸家不務雕飾其贈侍人沈云本是彈箏手
家貧學煮魚

諸城李漁邨侍讀澄中施愚山謂其詩豪逸清遠有詩

人之風康熙庚午典雲南鄉試著有滇南日記其沅州
山中聞鷓鴣一絕云空山雨氣散清秋匹馬王程不少
留怪爾聲聲行不得七千里外過沅州安若訥爲作墓
誌記其夢爲李攀龍後身龐雪崖論文絕句則有壽光
安子非知己強爲于鱗認後身之句其詩固不類滄溟
也

邵陽王幼華從孫豹人受詩時輦下稱詩有十子之目
十子者田綸霞雯宋牧仲犖丁澹汝澎曹頌嘉禾曹升
六貞吉謝千仞重輝葉井叔封顏修來光敏幼華其一
朱竹垞題其過嶺詩集云邇來詩格乖正始學宋體製

嗤唐風江西宗派各流別我先無取黃涪翁比聞王郎
意亦爾助我張目振凡聾詩十卷曰黃湄集曉渡望鄂
州云曉霧壓城頭蒼茫古鄂州風煙盤赤壁波浪下黃
牛星動連江鎖旗高隔岸樓由來征戰地不忍問東流
武侯拜風臺云舟泊楓林岸崇臺縱目初月明飛夜鵲
江靜抱嘉魚北渚鳴霜角南天急羽書東風今正便一
鼓破衡廬送家叔季鴻游睢上謁后土祠二首云綠楊
連岸曉風斜東渡汾陰汎客槎天際兩崖馳竹箭春流
三月涌桃花黃雲寶鼎淪衰草絳氣靈壇落暮鴉舊事
于今何可問市樓酤酒是生涯東風紫燕入叢祠河上

人家記舊儀古碣半沈天上水蒼松全折雨中枝依稀
三燭流光夜想像千官立仗時獨喜嘒鶯猶未歇看花
一路到汾隍題瀟湘萬籟圖云漠漠蘆花水滿灣萬竿
修竹映湘山日高八桂陰初合雪落三江綠未還離亂
相逢圖畫裏滄洲定想有無閒傷心極目連雲樹灑落
非因帝子斑古體如菟菴呈鍾子云芝水淙淙雲一灣
高槐作花清晝閒祇林近在板橋外剝啄一響開禪關
大河直瀉搖底柱推窗兩岸羅煙鬟洵州鍾子羈栖客
日扶筇杖相追攀對飲惟貰一壺酒坐令市上嘲寒慳
飲之不醉聊爾爾爲憐過眼千花殷終南之南有君室

室中兩婦皆朱顏一自西城動戍鼓
褒斜夜火燒青山
男兒蓬累亦云樂東門一出何當還
落日殘霞起晉望
隔林列岫光爛斑解得龍螭同幻相
長依香界齊人間
趙秋谷謂本朝詩人山左爲盛先清止公與荔裳同時
繼之者西樵阮亭而升六漁邨修來謝刑部田侍郎馮
舍人後先並起各有所就了無依傍故詩家以爲難西
樵題孟襄陽詩云魚鳥雲沙見楚天清詩句句果堪傳
一從時世矜高唱誰識襄陽孟浩然其微旨所寄也以
詩法授諸弟與漁洋情好尤洽其詔罷高麗貢鷹歌云
真人御極臨八荒百蠻九譯皆享王西旅之葵越裳雉

貢物各各因其方海東俊鳥好毛質鐵爪金眸猛無匹
九都作貢來天家特受韝鉞佐罽罽瞭鷹臺上秋天高
刈蘭驅獸行蒐苗羽騎驂驪翠華至星旃雲罕紛週遭
蒙鵠射熊未足羨跋犀殪兕勞遮邀是時摘條試一縱
萬人昂首瞻青霄飛鳥狡兔失巢窟委身灑血填君庖
至尊往往動顏色玉虬迴轡鳴蕭蕭柔遠猶然動睿旨
詔罷奇毛自今始行葦兼存踐履慈苗葭漫賦春田美
聖神舉動殊尋常此事悠悠古誰比君不見虬髯天子
英雄人佳鷁猶遣懷中死

崑山葉文敏順治十六年賜進士第三人釋褐後卽以